



Chhuh fan

1986

AGAPE

Vol. XXXII No. 327

SEPTEMBER 2019



Chhungkuaa Pathian biak

Phek – 2

Lawmna au aw

Phek – 7

SERMON

KRISTIAN CHHUNGKUA

ARTICLE

EI SIAM DAN

HRISELNA

Lak man : Kum khatah ₹ 100.00
Copy khat ₹ 8.33

EDITORIAL BOARD

Editor : Lalḥakimi
Joint Editors : Lalrinpuii
 Lalngaihzuai
Circulation Manager : Ruth Lalhmangaihi
Member-te : 1. Thanghlupuii
 2. Lalpianzami
 3. Lalrinliani
 4. Vanlalhruaii
 5. H. Lalfakmawii
 6. Rev. Dr. C. Chawngmingliana
Publisher : Rev. B. Sangthanga
Agape Phone No. : 0389-2326372
email : 0389-2301824 (Heng number-ah hian
 agapechanchinbu@gmail.com 0389-2322285 office hun chhungin
 biak theih a ni.)

A chhunga thu awmte

- | | | |
|--|---|----|
| 1. Editorial | - | 1 |
| 2. Kristian chhungkua : Chhungkuaa Pathian Biak | - | 2 |
| 3. Sermon : Lawmna au aw | - | 7 |
| 4. Kan chunnu ropui Women Centre | - | 11 |
| 5. Wales Ram Rawngbâwlina Chanchin | - | 14 |
| 6. Run mawi – Women Centre | - | 20 |
| 7. Hydrangea / Hortensia | - | 26 |
| 8. Hruaitute chanchin : Asha Thulung | - | 24 |
| 9. Missionary tana Agape chanchinbu laksaktute | - | 30 |
| 10. Hmangaihna Ina nau châwmna petute (Chhunzawmna) | - | 31 |

*Editorial***BEIHRUAL**

Pathian kaihhruainain Beihruual thla September kan lo thleng leh ta reng mai. Kum 1918-a Hmunhmelṭha Presbytery Inkhawmpui chuan, “September thlaah Beihruual hman ni se,” tiin a lo rêl a. Kan hriat angin nikum lamah Beihruual kum 100-na (Centenary) te hman niin kohhranho remchân dan angin Centenary lungphûm te buatsaih a nih kha.

Beihruual hi kohhran mite thlarau lama intuai tharna hun pawimawh tak a ni. Beihruual hman ṭan a nihna chhan tak hi ringlote ringtua siamna hun atâna tih a ni ber ṭhîn a, ringthar pawh an pun pah ṭhîn hle. Amaherawhchu, hun a lo kal zêl a, kan hruaituten Beihruual hun hman dan chu her remin, kohhran insawhnghehna lam leh hmasawwna, ringtu nun ṭhan lenna lam hawia inzirtîr nân te, hnungtawlhthe hruai kîr nân te, tlute kaihtawh nân te, chak lote tichaka Kristian chhûngkaw lam hawi inzirtîr nân te, Chanchin Ṭha hrilh darh zau zêl tûra infuih nân te kan hmang ta zêl a ni.

Tûn hnuah phei chuan Kristian Chhûngkaw Hapta leh Ramthar Hapta te kan lo nei ta zêl a. Pathianin he Beihruual hi mal a sâwm a ni tih hretu leh hmutute kan ni. Pathian hnênah hian lâwm thu i sawi mawlh mawlh ang u khai.

Amaherawhchu, hetih mêk lai hian tih dan phung pangngai anga neiha, hman liam mai mai pawh thil awm thei a ni. Chuvângin, he hun hlu tak, kan hruaitu hmasaten uluk tak leh hlâwk taka an lo hman ṭhin hi sâwtṭui leh ṭangkaipui nâna hman ngei tumin ṭawngṭaina nêṅ ṭan i la thar zêl ang u.

*Kristian Chhungkua***CHHUNGKUA PATHIAN BIAK**

Joba 1:1-5; Tirh 10:1-6; Sam 78:5-7

- Rev. Lalramchhana

Lecturer, Leonard Theological College

Jabalpur, Madhya Pradesh

Kohhran hi chhûngkaw kal khawmin a siam a ni a. Chhûngkaw hrang hrangte Lalpa rinnaah an chak that chuan kohhran pawh a chak thîn. Chhûngkuaa Pathian kan biak ho hi a pawimawh hle mai a, tin, biak ina chhûngkuaa Pathian biak ho theih pawh hi kan tan tharna tûr a ni. Chhûngkuaa thut ho dal te hian min tipumkhat a, kan tih ngei tûr a ni. Pathian biakna hmasa ber pawh chhûngkuaa tan a ni a, hun rei tak chhûng chu chhûngkuaa tih thîn a ni tih Bible-ah pawh kan hmu.

Chhûngkua - Pathian biakna hmasa ber Kaina leh Abela-teah khân kan hmu a, kha kha Bible-a kan hmuhah chuan chhûngkuaa Pathian biakna hmasa ber a ni âwm e. Chumi hnuah Nova te leh Abrahama te chhûngkua an lo lang leh bawk a. Abrahama hnênah chuan leilunga mihring awm zawng zawngte tâna malsawmna tûr thutiam kan hmu a ni. Genesis 12:1-3-ah, "Tin, LALPAN Abrama hnênah chuan, "I khaw lam ata leh i laichînteho zîng ata leh i pa in ata chhuak la, ram ka la entîr tûr che lamah kal rawh; tichuan, chi ropui takah ka siam ang chia, mal pawh ka sâwm ang chia, i hming ka tiropui bawk ang; tin, nang

malsâwmna ni ang che; tin, malsâwmsaktu apiang che chu mal ka sâwm ang a, ânchhe lawhtu che chu ânchhia ka lawh ang; nangmahah chuan leia hnam tin an la thawveng ang," a ti a.

Pathian biak hi chhûngkuaa vawn nun zêl tûr a ni. Deuteronomy 4:9-10-ah chuan heti hian kan hmu a: "Eng pawh ni sela, fimkhur ula, ngun takin invawng phawt mai rawh u; chuti lo chuan, in mitin a thil hmuhte chu in theihngihl ang a, in dam chhûngin in thinlung ata a bo dah ang e; in fate leh in tûte zirtîr rawh u. Tin, Horeb tlânga LALPA in Pathian hmaa in dina, LALPAN ka hnêna, 'Mipuite chu min koh

khawmsak rawh, leilunga an awm chhûng zawnga mi tih dan an zir theih nan leh an fate zirtîr tûrin ka thute ka lo hriattîr ang e,' mi tih ni pawh kha i theihngilh dah ang e". Chhûngkuua inzirtîr a inhlan chhâwn zêl tûr a nih thu hi Pathian hian a ngai pawimawh takzet tih a hriat, a sawi nawn a sawi nawn mai a ni (Deut 6:4-9; 11:18-21; 12:28; 31:12-13).

Chuti chung chuan Israel fate chuan chhûngkuua Pathian biak chu an ngaihtah a, an ngai pawimawh lo a ni. Roreltute 2:10-ah chuan, "Tin, chûng chhuan zawng zawngte pawh chu an thlahtute hnên lamah an kal khâwm zo ta a: tin, chu mite hnuah chuan LALPA leh Israel-te tâna a thiltihte pawh hre lo chhuan dang an lo awm ta a," tih kan hmu leh a. An fate hnênah Pathian thu an hrilh ngun loh avângin Israelte tâna Lalpan a thawhsak hre miah lo pawh an lo awm ta reng mai a ni.

Chhûngkuua hi Setanan râl phiarin min phiar a ni. Kohhran hmasaah kha chuan Setana hian chhûngkaw lam ai chuan kohhrana ringtute kha a bei nasa êm êm mai a; mahse, tûnah hi chuan kohhran a beih aia nasain chhûngkuuah beihpui a thlâk

mêk a ni. Chhûngkuua Pathian kan biakna hi a tihchhiata min hneh hun hunah kohhran hi a tluchhe dâwn tih a hria a; chuvângin, a zung aţangin min bei mêk a ni.

Setana hian kan chhûngkuua hi eng chen chiahin nge min hneh tawh, hnehna puang chhuaka kan do hmêlmapa hi kan hneh theih nâna intuai thar kan ngai hle a ni lo maw? Media hi thil ţangkai tak a nih rualin Setana hmanraw hriam tak a ni baw k a. Pathian hre chung a hmang lo tân chuan Setana min hliamna hmanrua a ni tih kan hriat a ţa. Kan ngaihtuahna leh kan hun hman dan thlenga min thununtu chu eng nge? Media hi a ni. TV hian kan fate a thunun tawh em? Mobile phone hian kan chhûngkaw eibar a tibuai em? Fing taka ngaihtuah chung a keimahnin kan thunun a ţul ta hle mai.

Chhûngkuua Pathian biak min ţulhtir ţhîntute zîngah hêng TV, computer leh phone hi a langsâr tawh viau em? Josua leh a chhûngten Pathian rawng bâwl an thlang ang khân, wawiinah hian kan chhûngkuua hian tu rawng nge kan bâwl dâwn tih kan chian a hun ta.

Kan taksa leh thlarau tân chaw kan ei a ngai a, chumi atân chuan chhôngkuua thil tih ho theih kan zir thar a ngai hle. Chhông inkhawm kan neih ho theih lohna chhan pakhat pawh kan chhôngkuua kan inkawm-ngeih tâwk loh vâng a ni fo. Chhôngkuua intihhlim te, chaw ei khawm leh hun hlimawm buatsaih hmangeta inko khawma kan tan thar a ngai a ni.

In khata chêng ho inbe ngai tawh mang lo te kan awm em? Nupa inkhak reng mai leh hlim ni hmel hmu ngai lo fate lakah eng nge hmuh kan beisei? Chaw pawh hi kan kil ho thei meuh tawh lo chu a ni. Chaw kil ho ringawt te pawh hi kan ngaih pawimawh thar a ngai a ni. Chhôngkuua kan awm hian, mahni mai inngaihtuah lova, kan chênpuite ngaihtuah tel hi mi tin mawhphurhna a ni tih kan hriat thar a tûl a ni.

Chhôngkuua Pathian biak hona hian chungkuua a phuar khawm a, Pathian be ho thînte chu kawng engkimah an inpawh bik thîn. Chhôngkaw maicham buatsaih hi pa ber awmnaah chuan pa berin a vawn nun a tûl a, chutih rualin mipa nêp ve tak tak hi kan tam tak avângin nu

berin a chhawm nun hrâm hrâm hi a tam zâwk mah âwm e. Inhmangaih tawna leh induhsakna te pawh hi amaha lo piang ngawt ni lovin, hetia chhôngkuua hun kan hman hona aţanga lo insiam a ni.

Chhôngkuua Pathian fak ho leh tawngtai ho thei chuan Pathian malsawmna an hnaih. Kan kohhran hian thil tha tih hi chhandamna a ni tiin kan inzirtir ngai lo va, Bible kan en pawhin thil tha tih hmangin chhandamna kan chang thei lo tih kan hria. Amaherawhchu, thil tha tih hmangin Pathian malsawmna kan ko thla thei thung. Kawng hrang hrangah chu malsawmna chu chang ve ngei tûra kan induhsak avângin thilpek chungchângah te leh thil tha tih chungchângah kan inzirtir thîn. Chhôngkuua Pathian be ho thei lo khawpa sualin keimahni min hneh chuan engtin nge Pathian malsawmna kan beisei ngam rêng ang?

Chhông inkhawm hi a tê ber aţanga a lian ber thleng tân a hlimawmin a hlawk tûr a ni. He thu hi thu pawimawh tak mai, inzirtir ngun ngai êm êm mai a ni a. Chutih rual chuan a thupek ang zawnga kan ngaih chuan a dik famkim thei lo vang.

Naupang thununna leh zirtîrna kan zir ðhinte pawh hi lehlam takah chuan Bible zirtîrna nêh chuan a inmil vek lêm lo a ni. Hlimawm tak leh hlâwk taka hmang tûr chuan rûn dala tih ve ngawt lam a kâwk lo va, ngaihtuahna fel tak hmanga, thupui bera neih a ðul tih kan hre thei awm e. ðhenawmte tih dan te pawh ngaihvena, kan chhûngkaw tâna ðha ber tûra kan ngaih, pa ber emaw, nu ber emaw ngaih dan ringawt ni lova, inrawn khâwma kan duana kan hman ðhin a ðul tihna a ni.

Naupang, ngaih dan la nei lêm loteah chuan thuhra ni se, mahnia ngaih dan nei thei tawh chinah chuan chhûngkuain kan sawi hova, tute pawh thu lo bîk awm lova, a neitu chan changa kan buatsaih a ðul a ni. Chhûng inkhawm kan hmana hun hmang ve duh miah lo te hi a chhan kan zir chiang ngai em? Duh dan riau an lo nei pawh a ni mahna! Kan sawi tum ber chu – tute pawh, a theih chuan naupang thlengin kan ngaih dan thawh khâwmin, kan chhûngkaw tâna hlimawm ber tûr leh hlâwk ber tûrin hman i tum ang u, tih hi a ni. Tih dan ngaia kan tih reng chhan hi a ðhat vâng leh a hlâwk vâng a niha, tih dan

dangte nen pawh tehkhina, a ðhat avânga la hmang reng kan nih chuan a ropui hlein a hriat a. Mahse, thatchhiat vâng te, inpêk tâwk loh vâng te leh ngaihtuahna tak tak kan sên loh vâng a nih chuan kan hun leh tha kan khawh ral mai maiah a ngaih theih bawk ang.

Chhûngkua hi kohhran bul leh inçanna a nih avângin chhûngkuaa Pathian biak ho hi kohhran tân a ðangkai a ni. Chhûngkuaa Pathian kan biak hona hi kan ngai pawimawh lo rei ta lutuk a, chu chuan chhûng tinte min tingê a, kohhran pawh a lo ngê a hial a ni. Kan kohhran kan hlim rei theih loh chhan eng nge? A chhan bul ber chu chhûngkaw hlim lo tê tê kal khawm kan nih vâng a ni a. Biak ina han hlim thut thû awm hek lo le. Amaherawhchu, he thu hi a lehlam lehlahmin a dik thei a, Pathianin hlimna min pêk pawh hi chhûngkua açanga inçan te leh kohhran açanga inçan te a awm a ni. Inchâwm tawn, a khawi zâwk zâwk pawh hlimin emaw, nguiin emaw awm se pakhat zâwkin a chhawm chhâwng ve zel a ni.

“Kan kohhran kan chak lo, kan kohhranah hian chuti khati,” kan ti a. A chhan chu kan

chhûngkuaah hian a zir chhuah theih deuh vek a ni. Chhûngkua leh kohhran hi a inzawm tlat a, pakhat zâwk hlimin pakhat zâwk a ngui thei lo, ti ila kan sawi sual âwm lo ve. Kohhran hmeichhia hian hun rei tak chu he thuruk hi hriain beihpui an lo thlâk tawh a. Sawisêlna tam tak kârah vawiin thlengin an chhuak ve hrâm hrâm te hi an fakawm hle a ni.

Lal Isuan Petera hnên-ah, "Tihtakmeuhvin, tihtakmeuhvin ka hriih a che, i naupan lai khân i tâiah i inhrêng a, i duhna apiangah i kal thîn a; nimahsela, i upat hunah i kutte i phar ang a, mi dangin an hrênsak ang chia, i duh lohna lamah an kai ang che," a ti a (Joh 21:18). In hrang hrangah leng kualin lo lâwm êm êmtu awm baw k thîn mah se, tawngkam duhawm lo tak tak tein an lo tawng khum châng a awm baw a. Chuti chung chuan kan kohhran chhûngkuaten chhûngkuaa Pathian kan biak ho theihna tûrin vawiin thlengin, hlau leh khûr chungin an chhuak hrâm hrâm a ni ber e. An thawh rah tam zâwk hi tûnah kan hmu nghal lo a nih pawn kan thih hnu thleng pawhin, tûn aţanga kum za liam hnuah pawh a la thawk

dâwn chauh a ni tih hriat a pawimawh a ni.

Chhûngkuaa Pathian biak ho tih hi sawi sawi mah ila, vawiina he thu chhiartute hian "Kan tih tûr a ni," tia ţan kan lâk loh chuan awmzia a nei tak tak lo vang. Chuvângin, "Thusawitu ai chuan a ngaithlatu an pawimawh zâwk," tih ang deuhvin, "Thuziaktu ai chuan a tihlawhtlingtu an pawimawh zâwk," ti ila, he thu-ah bîk hi chuan a dik lehzual âwm e. Kan Pathian, kan thatna tûra engkim min tihsaktu leh kan chhandam nana a fapa mal neih chhun min petu tân hian ni khatah hun tlêm te tal hi chu i pe ve ngei ngei ang u. Chhûng inkhawm hi hman duh leh duh loh a ni ber mai a, a duh lo tân chuan chhuanlam ţa deuh deuh sawi tûr a tam mai. A duh tân erawh chuan hman theih a ni tih kan hriat thar a ţûl. Chuvângin, kan hmang thei lo a nih chuan mi dang leh thil dang kan mawhpuh thei lo vang, keimahni ngei hi a mawh-phurtute kan ni. Kan chhûngkua hian puipa kan mamawh a, kan Pathian hi kan lo ngaihtah thîn a nih chuan, a tân hun i pe phal ang u.

*Sermon**Chairman kamchhuak***LAWMNA AU AW**

*- Lalrinkimi
Chairman
Inkhawmpui Lian*

Pathian hruainain Mizoram Presbyterian Kohhran Hmeichhe rawngbâwlna tluang takin a kal zêl a. Kohhran Hmeichhia min dipuitu Pi Zosaphluui hova bul an ãan lai te mitthlaa han suangtuah hian bul lo ãantute fakawmzia te, mawlmang tak leh thu awih tak sia an han che vel tûr te, harsatna tam tak kâra inkhawm an nei te, phâk ang tâwka sum an lo tuak te, ãawngtaia hma an lo la te kha a hluin, tuna an rawngbâwlna rah lo par chhuakte hi han hmu ve se an van hlim dawn em!

Veng tinah Kohhran Hmeichhia a ding a, mahni hmun ãeuhvah kohhran leh Lalpa tân hma kan la sung sung mai te hi thisena min tlantu kan Lalpa hi a lâwm ve ngei hian ka ring ãhîn. Ram pum huapin Kohhran Hmeichhe Kum Zana (Centenary) te kan lâwm tawh a, Bial leh kohhran mal pawhin Golden Jubilee te, Platinum Jubilee te, Silver Jubilee te, etc. kan lâwm bawk a. Pathian hnêna lâwm thu sawina nêna Kohhran Hmeichhiate hlim taka kan han che vel te hi hmuh a nuamin, Pathian hnênah rimtuiin a thleng ngei ang. Hetih rual hian Kohhran

Hmeichhiaten kan din chhan leh thiltum (motto) te theihngihlil lova hre reengin, a tihlawhtling zâwngin hma la zel ila. Kan din chhan pênсан zawng emaw, Chanchin Tha nêna inmawi lo thil lamah emaw chuan inthiar-fihlim zel ila, min thlangtu Pathian mit hmuha thianghlim leh a lawm tlâka thawh i tum zêl ang u.

Kohhranah member duhawm tak tak, ãhahnemngaihna leh inpêkna kawngah pawh kan tluk loh mi tam tak an awm laiin, Pathianin kohhranhote kaltlanga SEC-in Inkhawmpui Lian Chairman

atâna min han ruat ve mai hi khawngaih rawngbâwlna a ni tih ka hre chiang hle a. Mahni insit na hle mah se min kotu Pathian rinchhanin ka lo ding ve tawp mai a ni. Kohhranho leh member zawng zawngte min tawngtaipui reng tûr leh theihtâwpa min vênpuia, min tanpui tûrin ka ngên che u a. Hetianga mawhphurhna han neih takah chuan rilrua khat liam leh ka lâwmnate ka han tar lang ve ang e. Kohhran Hmeichhiaten hmalakna tam tak kan nei a, hêngte hi a hlawhtlin nan kan tan tlân a tûl hle a. Chungte chu kan hriat sa theuh ni mah se, rilrua kan vawna, tan kan lak lehzual theih nan han tar lang ila:

1. Kohhran Hmeichhe din tirh atângin Kristian chhûngkua kan vei hle a, Kristian chhûngkaw tha tak, nghet tak, chak tak din tûr leh khawvêl thlêmna so bulh bulh kâra ding nghet tûra fuihna hi eng lai pawhin kan mamawh reng a ni. "Ka pass tawh, ka thawk zo tawh," tih theih a ni lo va, kan thâwk tâwp thlengin sual sipai râl nên kan indo reng a ngai a ni. Kan tu leh fa, kan nupui/pasal leh keimahni ngei pawh invêng fîmkhur chungin kan

hum a ngai. Pakhat mah hloh lova Pa hnên kan thlenpui theih nan mahni chhûngkua theuh i veng ang u. Harsatna i tawh i beisei anga a kian mai loh avâng tein beidawng mai suh. I beidawn chuan hmelmapa a lâwm dawn a. Chuvângin, tha thlah lovin Lalpa au zêl rawh. Tu ma boral duh lova, mi zawng zawng chhandam duhtu chuan kan dilna a hria a, kan dam lai emaw, kan thih hnuah emaw pawh min chhang thei. "In thawh rimna chu Lalpaaah chuan a thlawn ngai lo tih in hre si a," min ti (1 Kor. 15:58).

2. Kohhran pum rawngbâwlna tihlawhtling tûra kan thawh hona te hi a ropuiin a lâwmawm ngawt mai. Kohhran Hmeichhia a din tirh atânga kohhran pui hna hrang hrang thawka kan lo chêt venate hi Lalpan mal a sawm nasa hle. Entir nan, Durtlanga Synod Damdawi In tân budget te siamin sum tam tak kan thawh tawh a, rilru buai enkawlna khawl te, nau piang harsa lak chhuahna khawl te, inzaina pindana êng tha chi (Hlim awm lova en tlang thei) te, kawchhûng enna khawl (ultrasound) te, damdawi in thar tukverh man te, etc. kan thawh tawh

thîn a, vawiin thlengin damdawi in mamawh atân hmunphiah, thutthleng, etc. Bial leh kohhran malten kan pe a, Charity Fund atân sum kan thawh thîn te hi a va hlu em! Hêng zawng zawng hi mamawhtuten an tângkaipui a. Lal Isuan, "Ka damlohvin min kan a," a tihte zîngah kan tel ve a ni tih i hria ang u.

3. T̄anpui ngaite Krista hmînga t̄anpuina kawngah pawh kan theih ang anga kan t̄ang t̄ang te hi a van ropui em! Mahni veng leh Bialah mi harsate t̄anpuiin hnuchhamte kan châwm a, Krîsmas dawnah retheite kan t̄anpuia, lusûnte kan thlamuana, kan t̄awngt̄aisak te hi Lal Isua rawngbâwlina kan chhonzawmna a ni a, "Heng mi te ber chungah in tih chu ka chungah ti in ni," Lal Isuan a ti.

4. Chanchin T̄ha puan darhna kawngah pawh mahni in chhûngah leh ram dangah Lal Isua hmîng kan lam a, kan t̄awngt̄aisak te leh thilpêk kan hlan thîn te hi a hlu a, thenkhatin ramthar field te tlawhin an mamawhte kan tihsak a, chu bakah missionary kan châwm sauh sauh te hi a va hlu em! Sum lemin vana ro hlu t̄ur,

thlarau bote kan seng khâwm a ni a, kan Lalpa duh zâwng tih hi kan chaw tui ber lo ni zel se. Vanram kan thlen hunah kan thilpêk leh t̄awngt̄aina avânga chhandamna changtute kan hmuh meuh chuan kan lâwmna a luang liam ngei ang.

5. Agape chanchinbu hmanga kan rawngbâwlina te hi a hlu êm êm a. Thu t̄ha tak tak ziaktute avâng te hian lawm thu kan sawi a, kan chanchinbu tihlutute an ni. Hrisêlna lam te, ei siam dan te, Sermon t̄ha tak tak te, zirtîrna fîng leh t̄ha te, bengvârna lam te, Pathianin anmahni a hruaina leh amah nêna an intawhna chanchin ngaihnaawm tak tak han chhiar te hian min tiharh sawng sawng thîn. Mi rethei tân doctor pan te a harsain sum leh pai a hek êm êm a, Agape bua Hrisêlna huanga chhiar t̄ur a lo awm te hi a thlâwnin doctor kan râwn a ni mai a. Ei siam zir man te hi a tam êm êm a, an hriatna leh an thiamna ui lova Agape-a an rawn thawh thîn te hi a hlu êm êm a ni. Tin, chutiang taka hlu, missionary-te tâna Agape laksaktu t̄hahnem tak kan awm te hi rawngbâwlina ropui tak a ni a, an chungah kan lawm hle.

6. Hmangaihna Inah fahrah leh chanhaite Kohhran Hmeichhiain kum 1992 atangin kan enkawl a, hetah hian sum tam tak kum tin sên a ni a, hemi atâna sum leh an mamawh petu leh nau châwm thîntute zawng zawng chungahite hian kan va lâwm em! Zawlnei Mika'n, "Sakhaw biak dan thianghlim leh soal tel lo chu fahrah leh hmeithaite kan" a nih thu min hrihl a (Jak 1:27), hei hi kan Pathian lawm zâwng a ni.

7. Women Centre, kohhran mite tang rualin kum 2012-a mi harsate dawmkâna tûr leh rahbi tleu, mahnia din chhuah harsate tanpuina hmun kan han din ta luah mai hi a va ropui em! Puan thui leh puan tah zirna hawn tawh a ni a. Mi tam takin an puan thui zirte chu ei zawn nân leh chhûngkaw châwm nân an hmang tawh a; puan tah pawh an thiamin eizawna hlawhtling tak a ni mêk. He Centre-ah hian

tisa thil chauh ni lo, thlarau lam nuna malsâwmna nêh hma lam an pan mêk a ni. Hnathawh te, hun hman thiam te, inkhawm leh tawngtai, thusawi chenin thlarau lam nunah pawh zirlaiten hma an sâwn a, Women Centre-a thawktute leh zirtirtute thahnem an ngaiin an fakawm êm êm a ni. Anni bâkah Women Centre tâna sum leh thilpêk chi hrang hrang petu leh tawngtaisak thîntute chungah pawh kan lawm êm êm a ni.

Kohhran Hmeichhiate rawngbâwlina zawng zawng kan sawi sêng lo va. Hêng kan sawi tak rawngbâwlina peng hrang hranga kan thawh hona leh tan hona te, kan inlungualna zawng zawng avâng tein lawm thu kan sawi mawlh mawlh a. Hetiang taka min hruaitu leh mal min sawmtu Pathian chungah kan lawm êm êm a, chawimawina sâng ber kan hlân a ni.

TIHDIKNA

August thla issue cover-a Zawlnuam Pastor Bial Kohhran Hmeichhia Leadership Training tia thlalak tarlan kha Zonuum Pastor Bial Kohhran Hmeichhia Leadership Training tih zâwk tûr a ni e. Tihsual palhah ngaihdam kan dil e.

- Editorial Board

KAN CHUNNU ROPUI WOMEN CENTRE

- P.C. Lalngaihzuali, Kawnpui

1. Hring nun lamtluang zawh tûrin, mîm ang kan lo piang ve a,
Hring chan zirin hring nun kan chhiar ve e,
Tawn tûr leh hmachhawn tûr a tam lua e;
A riang naufa tân zawng mi kam ðuah ruala kam ðuah ve tûrin,
Chun leh zua tân thlunglu a hai ngei.
2. An hrai riangtê hmakhua an dâwn khâwlin,
“Engtin awm ta zêl ang maw?” tiin,
An hrai riangte eibar zawwna tûr an dâwn tlai ni tinin;
Ngai ru...lunglam vai chun leh zuate u, chu! thâwm ri mawi a lo ri,
In hrai riangtê eibar zawwna tûr a lo eng ta;
A sakhminga'n WOMEN CENTRE an sak chu,
Women Centre hian in rûmna khawfing a rawn chhat ngei dawn e.
3. Chunnu lungmâwl tiin sêl ðîn mah se, Aw...an mâwl lul lo, an dâwn kim ngei;
A riang naufaten lei rem kan rah ve nân tiin, an tha leh zung, an thiamna an sêng e,
An hnatlang âwl lo, ni khat hlawn an thawn âwl hek lo;
Chu mai a la ni lo, thingphur an keuh leh ðîn,
Kan Zoram Kohhran Hmeichhiate u, in va zahawm tak em! Kan chhuang a che u.
4. In thawn rim, in chhelna, Pathianin mal a sâwm a;
In thiam, in fin, in theih tâwk baka chuang ðîn Lalpa'n a hai lo,
A taka changtu chu keini Women Centre-a puan ðui leh puan tah zirlaite,


In fate ngei hi kan ni e;
 Kein in thawh rim zârah eizawna kawng bul ãanna
 tûr kan lo nei ta,
 In dâwn kim ngei chunnu zahawmte u, kan lawm e, kan
 chhuang che u.

5. Kan chunnu zahawmte u, lungphâng lo ula,
 In zârah hian kohhran leh khawtlang tâna
 Hrin manawm tak fanu nih zêl kan rawn tum na'ng e;
 Kan tâna in thawh rimna hi kan dam chhông pawh hian
 kan rûl sêng lâwng e, kan lawm e!
 Kan chhuang a che u, chunnu zahawm Kohhran
 Hmeichhiate u,
 In sakhming sawi hi kan bâng dâwn lo kan hring chan
 chhông hian.
6. A sakhming Women Centre tiin an vuah e,
 I tlâkna leilung hi zu hmun sa hmun tiin sel
 ãhîn mah se,
 Aw... i mawi chuang ngei keini a riang naufa tân chuan;
 I zârah, nangma zâr ngeiah hian,
 He phunbông pui zâr zo tûr leh
 I pâr zu dâwn tûr hian,
 Zoram naufaten an la rawn bêl zêl dâwn che nia.
7. Zoram tlang tin naufa, chhim leh hmar, chhak leh thlanga
 mite fuan khâwmna,
 Chunnu chan châng min lo chawia, min lo kuangkuahu
 chu,
 Women Centre, nang ngei hi i lo ni e;
 I hliap zâr hnuaiyah, a piang ve a ni tih pawh inhre rêng
 rêng lo tûr te,
 Hlim taka min lo kuangkuaha, min nuihtîr bâwk bâwktu,
 Unauva min siamtu, chhûl khata min kualtu chu nang
 ngei hi i lo ni.

8. Ṭhenkhat chhungkaw harsatna avânga,
 Zirna rûn sang kai chhonzawm thei lote,
 Harsatna chi hrang hrang avânga lungngaia
 indawm kûn mêkte tâna,
 Beiseina meichher rawn chhit ênsaktu chu,
 Tu dang ni lovin Women Centre, nang ngei hi i lo ni.
 Kan tân i hlu, kan tân chunnu, kan tân engkim i ni;
 Ṭhang leh thar, chhuan lo la awm zêl tûrte tân,
 Malsawm tin phurtu lo ni zêl la, vul reng na'ng che;

CHUNNU ROPUI WOMEN CENTRE, KAN HMANGAIH CHE

*{P.C. Lalngaihzuali hi Women Centre-a puan ṭhwei zir mek
 (5th Batch) P.C. Lalremmawii laizawn a ni e. - Ed.}*



PASTOR NUPUI INTAWHKHÂWM HRIATTIRNA LEH SAWMNA

Pastor Nupui Intawhkhâwm chu a lo hun leh dâwn ta a. Pastor pension tawh leh thawk lai nupuite leh, Pro. Pastor nupui zawng zawngte he hun pawimawh taka lo tel tûrin kan insawm a ni. A hnuaia mi hi proramme tlângpui a ni -

A hun : Ni 17.10.2019 (Ningani), dar 10:00 a.m.
 A hmun : Synod Conference Centre, Mission Veng
 Thupui : Miten Pastor nupui an hmuh dan leh an beisei dan
 Sawitu : Upa H. Zoliana, Ramhlun Kohhran
 Ruai : Dar 3:30 p.m.

WALES RAM RAWNGBÂWLNA CHANCHIN

- Rebecca Lalbiaksangi

Partner in Mission (Church Community Worker)

Council for World Mission

Llanfair Uniting Church

Heol-Y-Waun, Penrhys, Ferndale CF433RH

Wales, United Kingdom

A hmasain kan thawhna kohhran Llanfair Uniting Church hming leh Presbyterian Church of Wales hmingin chibai ka bûk a che u. Pathian hruainain kum 2003 aţang khân missionary-in ka chhuak ve a. Madagascar-ah kum 8 hnuchham inah ka thawk a; chutih rual chuan Madagascar-a ka thawhna kohhran Church of Jesus Christ in Madagascar (FJKM) HIV/AIDS project-ah part time-in ka pui thîn bawk.

Tichuan, July 2011 aţang khan kan chhûngin Llanfair Uniting Church, Penrhys-ah kan thawk ţan leh ta a. Penrhys hi South Wales a awm a ni. Kan pa, Miara hian a hna (Lawyer) kalsanin kan thawhna kohhranah full time volunteer-in a thawk ve bawk. Fanu pahnih – Hannah kum 10 leh Seren kum 5 mi kan nei.

Miara hi Malagasy a ni a, Madagascar-a missionary lût hmasa berte hi Mizoram ang bawkin Welsh mi an ni

a. Hemi vâng hian Miara nen hian Welsh mi hi kan ngaisang thîn êm êm a. Kan Welsh missionary-te avângin ziak leh chhiar kan thiam phah a, anni avângin Pathian hmangaihna kan hriat phah a. Kan khawtlang nunah nasa takin thil ţa tam tak min zirtîr tih tu man kan hai ka ring lo. Heng avâng te hian Penrhys-a thawh chu kan phûr lehzual a, hmâna thil ţa min petute hnênah kan theih ang ang kan pe lêt ve dawn niah kan ngai a, kan phûr hle a ni.

Kan awmna Penrhys hi mi 800 vel chauh awmna a ni a, tlang chhîpa awm, khaw thenawm kal dawn chuan tlang aţanga chhuk phawt ngai a ni. Hemi avâng hian hmun fianrial (Isolate) te pawh a tih theih ang. Dawr pakhat chauh a awm a, restaurant tenau - ‘take away’ kan tih ang hi pakhat a awm bawk. Sap ram chu a ni naa, hmun hnuaihning kan tih ang a ni ber. Mi tam tak chuan Penrhys-ah beisei tûr thil tha an nei lem lo. Penrhys hi mi retheite leh harsate awm khâwmna hmun, hna nei lote awmna hmunah ngaih a ni. Chuti chung chuan car, satellite TV-te an nei fur lawi si. Hna nei lo mah se, ei khawp tûr sawrkarin a pe reng a, kar tin pawisa an dawng a. Chenna tûr in (house) a pe bawk a, doctor râwn man leh damdawi ina inenkawlna zawng zawng a thlawn vek a ni bawk si a, an vanneihzia kan hrilh fo. India rama retheih nen a inan loh em avângin mak an ti thîn hle.

Mizoram leh Madagascar-ah chuan zing khaw awm dan aţang hian wawiin khaw awm dan tûr kan rin hriat thei thîn. Penrhys-ah chuan ni khat chhông hian climate hrang hrang kan tawng hi a ni ber. Ruah te hi a rawn sûr thut thut a, a hnuah vur te a rawn sûr leh a, a hnuah rial a tla thul! Ni te a rawn sa leh lawi si, a châng chuan. Weather forecast en hi a lo ţangkai thei hle mai. Wales ram hian ruahtui an dawng tha êm êm a, kan awmna tak pheih hi chu tlang chhîp a nih avângin kan dawng nasa lehzual. Thli a na bawk. Nihliap te hi chu a ţangkai lo, a tliak nghal a ni mai. Chuvângin, raincoat hi kan ha deuh reng mai a ni. Ram luma awm ţang kan lo ni si a, thlasik chu a vawt duh khawp mai.

Penrhys-a lo kal hi mi tam tak chuan an ngam lo, hmun hlauhawma ngaih a ni thîn. Hun kal taah chuan motor park lai hal mai te, drug leh criminal-te awm khâwmna hmun a ni thîn rêng a, an

thiamawm viau tho. Amah-erawhchu, tunah chuan a danglam viau tawh. Heti chung hian hetiang ngaih dan ‘Stigma’ hi a la awm reng a ni. Vawi khat pawh dawr pakhatath thil ka lei a, nu pakhat hian min bia a, khawiram aṅanga lo kal nge ka nih te, eng nge ka tih te min zawt a. “Penrhys-ah ka thawk,” ka tih chuan a phu zawk a, “I va’n huai em! Penrhys-a han awm chuh!” a ti a, a dik bawklah tak a.

Penrhys-ah hian tân thlengin harsatna tam tak kan la tawng reng. Drug leh zu problem te, hna neih loh avânga harsatna tâwk te, depression te hi a tam êm êm. Mahse, hêng zawng zawng ni chung hian Penrhys chu hmun ‘special’ tak a ni tlat. Mihring awmte an inhman-gaih êm êm a, an ṅang rualin an inpui tawn nasa êm êm bawk. Sap ramah te chuan ṅhenawm khawveng an inngaihsak êm êm tawh lo va, mahniin engkim hi an ti a ni ber. Mahse, Penrhys-ah chuan a ni ve lo. Mizote ang

hian chhiat tawh leh damloh te, mi dang mamawh nikhua hian an inpui tawn dial dial ṅhîn.

Kan thlen tirh aṅanga tun thleng hian min dawn-sawn dan hi a la ngai reng a, damloh nikhua leh kan fate an han dam loh te hian mi an ngaihtuahin min buaipui êm êm ṅhîn a, Pathian hmangaihna a takin ka dawng ni berin kan hria, a ropui kan ti ṅhîn hle. Kan thawhna hmuna hetiang taka min pawm (accept)-tu dawn hi missionary-te tân chuan thil pawimawh lutuk a ni a. Thawh honaah pawh nasa takin nghawng a nei fo. Hmun dangah awm mah ila, kan thawhna mite avâng hian mi hrang angah kan inngai lo va, rilru nghet takin hna kan thawh phah thei a ni.

Kan thawhna kohhran hming hi sawi tawh angin Llanfair Uniting Church a ni a. Kohhran hrang hrang pariat inzawm khawmin a enkawl a ni a. Chung kohhrante chu:

1. The Presbyterian Church of Wales.

2. The United Reformed Church.
3. Welsh Independence.
4. Congregational Federation
5. Baptist Union of Wales.
6. Baptist Union of Great Britain.
7. Church in Wales (Anglican).
8. Methodist Church.

Hêng zinga pali hi CWM member-te an ni a, kan thawhna kohhran Llanfair hi heng CWM member 4-te thawh hona hmun awm chhun a ni. Chu mai ni lovin, PCI leh FJKM (Madagascar) te chhiar tel phei chuan CWM member church 6 lai thawh hona hmun a ni. Hetiang hmun hi khawvêlah hian a awm tam lovin ka ring.

Kohhran building hi Penrhys khaw laili takah a awm a. Biak in ‘Chapel’ chauhva awm lovin Chapel chungah chenna in flat pali a awm a, restaurant (Café) kan nei tel bawk. Tin, Youth Club te, Home-work Club te, Sports and Fitness te, Laundrette (Puan sùkna khawl) te kan nei a. Hêng

kan project hrang hrang hi he kohhran din ÷an 1992 khân khawtlangin mamawh an intihte a ni. Hêng kan rawngbâwlina peng hrang hrangahte hian naupang aṅanga tar thlengin an rawn kal ṭhîn. Zan lam café-ah hian naupang intihhlîmna kan buatsaih ṭhîn a, a châng chuan mi 70 lai te an lo kal ṭhîn.

Film chhuah zan te kan nei a, a chângin games kan buatsaih ṭhîn. Naupang intihhlîmna zan kar khata vawi hnih kan neih ṭhinah hian thil dang tam tak pawh tih pui ṭhin an ni. Hetiang taka kohhran leh khawtlang an thawk ho hi keini nupa tân pawh thil zir tham a ni tak zet mai.

Kan venga primary school naupangte hi Thawh-ṭanni zing apiangin an lo kal a, devotion kan lo neihpui ṭhîn. Hei hi Sunday School ang deuh a ni a, naupang tam zâwk hi chu inkhawm ngai lo, Pathian pawh hre lo an ni. He devotion avâng hian Pathian thu zâwi zâwiin an hriat phah a, kan rawng-

bâwlna peng pawimawh tak pakhat a ni. Naupang sikul lama an haw hnuah puitling Bible Study kan nei zui leh thîn bawk. Hei hi kan Pastor-in a kaihruai thîn a, hmun hrang hrang, kohhran hrang hrang ațangin minrawn zawm thîn a, discussion thā tak tak kan nei thîn. Hêng huna mi dangte ngaih dan leh an rin dan han hriat te hian ngaihtuahna a tizau thîn hle.

Ringtu ni kher lo pawhin kohhran chu ‘Ka ta’ an ti vek mai a. Inkhawmin lo kal kher lo mah se, kohhran puih duhin anrawn in-volunteer fo. Naupangte hlei hlei hian kohhran hi an intineitu thîn. Mikhual han nei hlek ila, anrawn lût a, “Tu nge ni? Eng nge arawn tih?” tiin anrawn zâwt thuai thuai thîn. Inkhawm tûra anrawn luh te hian an tlangnêl êm êm a. Sap ramah chuan biak inah naupang leh thalai an vântawh nen, Penrhys-ah chuan kan inkhawm te hi naupang an tam mah thîn zâwk fo.

Mizote chuan biak in te chu kan zah êm êm a, a

chhûngah pawh theih tâwka mawia awm tûr tiin kan inzirtîr thîn. Hêngah erawh chuan ei tur leh in turte nen an lut fo va. Kan inkhawm te hi ‘group discussion’ ang deuh hi a ni a. Sermon te hi thuthmun ațang te hian puitling te pawhin an lo comment a, eng emaw kawng zawng tak chuan a thā phian. Kan thlen tîrh khân ngaia neih kha har ka ti deuh thîn. Vawikhat pawh thu ka sawi a, ka din chhuah laiin naupang pakhat hian minrawn pan a, “Ka zun a chhuak a, khawngaihin min lo hruai lawk,” arawn ti a! Ka thil sawi lai theihngihl phungin ka awm pah. Naupangte chu inkhawm mai ni lovin kan activity hrang hrangah anmahniin an lo kal mai a. “Kum 5 hnuai lam chu puitlingin hruai tûr,” han ti thîn bawk mah ila, an lo kal miao hi chuan han inhnar hi a har thîn. Thlasikah te chuan khua a thim hma si a, an inah thlah ngai hi an awm fur zel a, darkar khat dâwn te inthlah ringawt hian kan inzui dûl dûl thîn. An chhûng hnaite niah

kan inngai ve mai a, an chhûngte lah chuan kan activity-a rawn kal an nih chuan an ngaih hi a tha êm êm zel mai bawk si a.

Thil pakhat, mak kan tih mai mai chu, Penrhys-a chhûngkaw tam tak hi chhûngkaw rual tak tak an ni a. Tunlaih chuan fa neih tam loh te kan inzirtûr a, a bîk takin India ram leh China ramah te. Penrhys-ah erawh chuan fa 8 nei te hi an la awm nual mai. Khawtlang hrim hrim hi an naupang hle. A then pheih chuan kum 35 an nihin tu an nei der tawh. A then chuan kum 60-ah te tuchhuan an hmu tawh bawk.

Vanduaithlâk takin naupang tam zâwk chu nu leh pa nei mumal lo an ni a. A then pheih chu pa hmel la hmu ngai lo, pa hmangaihna pawh hre thiam lo an ni nual. Miara hian kan hnathawhah hian hmun pawimawh tak a chang

kan ti thîn. A chhan chu Miara hi an ngai êm êm a, pa ang maiin an en fo. Miara thusawi chu an âwih êm êm a. An chhûngte pawhin an fel vak loh chuan Miara hnênah an rawn sawi a, Miara hian zawi zawiin fel lo deuhthe chu kawng tha zâwk kawhhmuhin a kawm fâl thîn. Nu leh pa, pi leh pu aţanga hna nei lo an tam avângin hna neih awmzia la hre lo an awm nual mai. Heng problem hrang hrang avâng hian ţanpui an ngai êm êm a, naupang aţanga puitling thleng mai hian harsatna an tâwk fo. Naupang aţanga puitling thlengin mahni inrin tâwkna (confidence) te hi an nei lo va, an depress bakah attention seeking an tih ang chî hi an nih deuh vek avâng hian dawhtheihna neih a pawimawh thîn êm êm a ni.

(Remchangah a chhunzawmna tihchhuah leh a ni ang. – Ed.)

Agape August issue-a Northeast India Christian Council Women Assembly (NEICCW) 13th Biennial Assembly Report ziaktu Lalthanzami, Finance Secretary, Central Committee tih kha Central Committee ni lovin NEICCW tih zâwk tûr a ni e. Tihsubal palhah ngaihdamna kan dil e.

– Editorial Board

RUN MAWI – WOMEN CENTRE

- R. Lalrinpui
Superintendent, Women Centre

Bul kan ãan laih laih chauh em maw tih laiin kum thum lai a lo liam ta reng mai. August 2016-ah khan phûr tak si, rilrua huphurh ru angreng takin puanthuah tel meuhvin thawktu tûr mi 5 leh puan ãhui zir tûr mi 40-te nen Mizoram Presbyterian Kohhran Hmeichhiate "Runmawi – Women Centre" kan luah lum ãan ta kha a ni a.

1. Burger aiin ram bai: Hmun tharah tih dan thar, thawktute leh zirlaite, kan piang ve a ni tih pawh inhre lo ãhiau, khawte din khawp zetin riahrûn kan rem a, kan dai chho bawrh bawrh a, kan dai baw nualin ka ringhlel lo ve. Kan luh hlim khaw lum dan êm êm kha. Mahse, nuam kan tiin kan va hlim tlang ãhîn tak em! Zirlaiten an ei châk duhthu an han sâm a, mi faten Pizza, Burger, KFC, etc. an tih laiin keini chuan 'ram bai' kan châk ber! An duhthusam hian min nuihtîr nasain, tihpuitlinsak a har lo ãhîn teh a nia.

2. Rinna tuikhur: Min lo hmuaktu tih tûr leh hnathawh tûr khân min daih êm êm a, keimahni lam hian kan daih lo zâwk mah. Chhun leh zana puan ãhui zir bâkah thawh ngai apiang hlim takin kan thawk ho bawrh bawrh a, compound chhûngah

rinnain tuikhur kan lai a, tuikhur ãha tak kan sual chhuak dêr mai. Vawiin thleng hian a la kang lo. Rin tlâk leh belh tlâk Pathian a nihzia kan va hmu Chiang ãhîn em! Centre tuikhur hmuh leh sawi apiangin batch hmasa berte kha mitthlaah an lang ãhîn. An taihmâkzia leh thawh rimzia kha aw! Class tibuai miah lovin batch tinten a ãul ãul thawkin, hming chherna an nei zel ãhîn.

3. Bungraw thiar: Batch hmasa ber zirlaite ãha taka an zir zo mittui nêen kan inthlah liam hnu lawkah puan ãhui zir batch 2-na tûr an rawn lût ve leh a. A hmaa mite ang bawkin puan ãhui zir bakah thawh tûr awm apiang an thawk bawrh bawrh a. Batch 2-na chhung hian building hnuai lam sak zawh bak chu puan tah zirna atâna siam pum hna thawh a ni

a, in sakna bungrua leh hmanrua a t̄ul apiang hlawhfa lâk ngai lovin hlim takin an thiar th̄in. A t̄ul apiang thawka ning leh hah hm̄el hmuh t̄ur a awm ngai lo te kha hmuh a nuam th̄in a nia.

4. Trade thar: Kan hruaituten huang zauh z̄elin, July 2017 aṭangin trade thar – puan tah zirna hawn belh a lo ni ta a. Puan th̄ui Batch 3-na leh puan tah batch 1-naah chuan thawktu pakhat leh zirlai th̄enkhatin min belhchhah leh ta bawk a, khua a har lo lehzual. Zirlai an lo th̄athnem tak deuh av̄angin building hnuai lamah bathroom 12 siam belh a ni a, a t̄ul apiang kan naute hian an thawk leh bawrh bawrh mai a, kan z̄angkhai phah hle th̄in.

5. Lawmna mittui: Puan th̄ui leh puan tah zir chh̄ung thla 6 ni th̄in kha kum 2018 aṭangin kum khat zir t̄ura ruahman a ni ta a, puan th̄ui zir batch 4-na leh puan tah zir batch 2-na bul kan ṭan phat aṭangin staff quarters t̄ur 2 leh building hnuai ber siam hnathawh niin hna ṭau a ṭet tak tak a ni. Class an kal bak chu centre tâna ṭangkai tih nan kan hmang zo vek a ni ber. Kan zirlaite hian thawh hreh an nei

lo va, mipa hna leh hmeichhe hna kan thliar hrang hek lo, hnathawh kha an ch̄ak zek zek em maw tih mai t̄ur a ni hial.

Ṭum khat chu in sakna t̄ur cement bag eng emaw zat kha khua a ṭhat êm av̄angin verandah-ah kan dah mai a. Kan beisei loh lutukin varṭianah ruah a rawn s̄ur ta! A huh kan hlau si, rilru buai taka kan awm laiin kan naute kha rang takin room aṭangin an rawn tlan chhuak. A thleng hm̄asa apiangin cement bag kha in chh̄ungah kan vawm l̄ut pawp pawp a, minute rei lo te chh̄ungin kan dah fel vek nia! Kan khu rum rum a, kan paw vek chung khân an hmel hmuh a nuam a, zingkâr hlimawm leh nuam ber a ni hial ang. A neitu rilru pua, centre tâna an th̄ahnemngai hmel hmuh khân lawm av̄angin mittui a tla hial. An taihmakzia leh an thawh hlawkzia kha vawiin thlengin kan hrilhfâk. Batch dang ai mahin an zirlai an thiam z̄awk em maw tih t̄ur a ni z̄awk tlat.

6. Tuthlawh leh chemkawm nen: Puan th̄ui zir batch 5-na leh puan tah zir batch 3-na kan bung m̄ek a. Batch dang ai chuan zirlaite hi an naupang ṭlâng deuh naa, ho khawm an

nuamin, zirna kawngah pawh hma an sawn hle. Tuthlawh leh chemkawm nêh ngata hostel lût an ni bawh a, compound chhûng a hnim hman meuh lo. Thawh tûr awm apiang an thawh bawh bawh thei zêl hi a lawmawm hle.

7. Nunphung: Women Centre-ah hian puan thui/puan tah thiamna bakah tisa leh thlarau nun tak neih kan ngai pawimawh a. Zirilaite hi eizawna tling khawpa thiamna nei tûrin thahnemngai takin zirtirna pek an nih bakah an awmna apianga mi tângkai ni thei tûrin theihtâwpa buatsaih an ni. Khêl lovin zingkâr fianrial hun leh zanah devotion hun kan hmang a, zan lamah hian zirlaiten sharing hun te leh short sermon-te an neih bâkah, Nilai leh Beihrial thupui te zirin sawi hona hun te kan hmang thîn a, zirilaite pawhin an hlawkpui hlein kan hria.

Phunchawng Kohhranah Inrinni zan leh Pathianni nileng leh zan hi kan inkhawm thîn a. Phunchawng Kohhran hruaituten min lo dawngsawng tha êm êm a. Chu bakah batch tina zir chhuakte pualin thlahna hun min buatsaihsak a, refreshment tuihnai tak min hlui ziah thîn.

Nu leh pa chan changa min ngaihsaktu Phunchawng Kohhran hruaitute chungah kan lawm takzet a ni.

Faina hi Women Centre thupui pakhat a ni a, a chhûnga chengte hian building leh compound chhûng leh pawn kawngpui hrûl hi a tûl dan ang zelin ni tin kan tifaï thîn a, chu bakah cook hranpa nei lovin zirlaiten a inchnâwkin ei rawng an bâwl mai thîn.

Second batch atang khan batch tin zirilaite hi outing neihpui thîn an ni a, Synod hmun pawimawh hrang hrangte tlawhin an hlâwkpui hle. Tin, zirilaite hi sports neihpui thîn an ni a, hma an sawn theihna tûr item chi hrang hrang – elocution, extempore speech, quiz, sermon ziah, solo, recitation, group zai leh lam, etc. bâkah indoor leh outdoor games chi hrang hrang nen hun hlimawm leh hlâwk tak kan hmang thîn.

Synod Revival Speaker-te ruaiin batch tinah retreat neih thîn a ni a, kan hlâwkpuiin, tisa leh thlarauvah lâwmna thar nen centre-ah hun kan hmang thei a. Zirlaiten an kut themthiamna mai bakah tisa leh thlarauva

hmasawna thar nen Women Centre-an chhuahsan thei thîn hi kan lawmna ber a ni.

8. Puan thui zirna: Puan thui zirnaah hian zirlai 40 an awm thei a, batch tinah hian zirlai an lût kim thei nain, hrisel lohna leh rokhawlhna dang eng emaw avânga zir tluan thei lo an awm ve leh thîn. Batch hmasa berah 37, batch 2-naah 33, batch 3-naah 39 leh batch 4-naah 37, an vaiin mi 146 ten hlawhtling takin an zir chhuak tawh a, batch 5-naah hian zirlai 35 an bung mêk a ni.

Puan thui zir chhuak tam zâwkte hian puan thui hmangin ei an zawng ve mêk a, chhûngkaw tâna chhenfâkawm, an ei bêl ber eng emaw zat an awm tih report kan dawng thîn te hi a ropui ngawt mai. Zir chhuak tawh eng emaw zat hi Aizawla puan thuiina dawr hrang hrangah thawkin an inhlawh ve mêk a, anmahni khua leh in lama thui thahnem tak an awm ve tawh bawk. Mi mal thawmhnaw an thui bakah bial zaipawl uniform te leh sikul uniform an thui thu te an rawn report ve thîn a, a lawmawm hle a ni. Hêng bakah hian mi hnuai inhlawha intuak phawt hnua mahni puala dawr

hawng te leh, puan thui zirlai nei thei khawpa hlawhtling an lo awm ve ta te hian Women Centre hlawhtlinna a tar lang zel niin kan hria.

IX. Puan tah zirna: Puan tah zirnaah hian zirlai 10 an awm thei a, seat hnawh khat tûr zirlai kan nei meuh lo thung. Zir tûra lût zet tawh, hrisel lohna leh rokhawlhna dang avânga zir tluan thei lo an awm ve bawk a. Puan tah zirna batch hmasa berah khan zirlai 6 leh batch 2-naah 6, an vaiin mi 12-in an zir chhuak tawh a, batch 3-naah hian zirlai 6 an bung mêk a ni. Puan tah zir chhuak hi an la thahnem lo hle chungin, a tam zâwk hi mi hnuaiah thawkin eizawn nan an hmang ve mêk a, chhûngte châwm thei khawp an lo awm ta hi kan lawm hle a ni. Anmahnin an duh phawt chuan puan tah zir chhuakte tan hian thawhna tûr a tam êm êm a. Handloom nei eng emaw zatin zirlaite hi an hnêna thawk tûrin an rawn hauh lawk thîn a, an duh khawp zirlai kan nei lo zâwk a ni.

Tin, Women Centre aţanga zir chhuakte hian an luh hma aia kohhran an belh tâk thu te, taihmâkna kawnga hma an

sâwn nasatzia te leh in chhûngkhur tâna an ãangkai tâkzia thu an chhûngte ngei hnên ațanga kan dawng ãhîn te hian Women Centre hi kut themthiam zirna mai ni lova taksa, rilru leh thlarauva hmeichhiate chawm liantu a nihzia a pho chhuak niin kan hria a, kan lawm hle a ni.

10. Centre Kutchhuak:

Zirlaite kutchhuak hi man tlawm tê têa tihral ãhîn a ni a. Women Centre-ah lei theihin a awm reng bakah a remchan dan angin Mission Veng, Bawng-kawn, Vaivakawn leh Dawr-puiahte Inrinni bazar-ah zawrh chhuah ãhîn a ni a. Tin, Inkhawmpui Lianah zawrh chhuah a ni tawh bawk. Hêng zirlaite kutchhuak hralhna ațang hian sum eng emaw zat hmuhchhuah a ni tawh a, hêng sum hmuhchhuahte hi Kohhran Hmeichhe Office lamah kan chhûng lut zel ãhîn.

XI. Hnatlang leh thilpek:

Women Centre hmun tûr neih ațanga a sak zawh thlengin hnatlang thâ eng emaw zat a lût tawh a. Tin, a building luah luh a nih ațanga vawiin thlengin kohhran, Kohhran Hmeichhia leh Kohhran Pavalai Pawlte a

țul apiang thawkin, mahni insêngsovin an rawn hnatlang ãhîn a, a lawmawm takzet a ni. Kohhran hrang hrang ațanga hnatlang tha leh sum leh pai thawhtu zawng zawngte inpekna leh thawh rimna hi Kristaah a thlâwn lo vang tih kan ring tlat a. Pathianin malsawmnaa a vûr let che u kan beisei tlat a ni.

Hetiãng taka Women Centre a lo puitlin theih nan hian mi mal leh kohhran ațangin thilpek tam tak dawn a ni a, a neitu Kohhran Hmeichhiaten ãhahnem an ngai êm êm a, thi leh thau pawlh takmeuhvin an thawk a, buiding sak zawh a nih hnuah pawh tha thlah lovin an ațang zel a, tun dinhmun hi a lo thleng ta a. Kohhran Hmeichhe member tinte inpêkna leh thawh rimna avângin hmeichhe chanhai leh dâwm kan ngai eng emaw zatin eizawna an lo neih phah a, mahni kea an lo ding ve thei ta hi a ropui takzet a ni. Women Centre hi Kohhran Hmeichhiaten an tuamhlawm tlat a, kohhran hrang hrang ațangin tlawhtu kan nei reng a, a thlamuanthlâkin, hei ringawt pawh hi he laia thawktu leh

zirlaite kan lâwm tawh tehreng nen, kan mamawh bungrua chi hrang hrang, sum leh pai bakah thlai leh thei ei tur te, thilpek chi hrang hrang min rawn pe thîn hi a lawmawm takzet a ni. Women Centre tâna thilpek petu zawng zawngte a lêt tam takin Lalpa'n malsawm se tih hi kan tawngtâina a ni.

12. Pathian bel ruat: Women Centre-a zirna bul tan ațanga vawiin thlengin kan hruaituten ngaihtuahna tam tak sengin, Centre tâna hmasawmna kawng an zawng a, a thim a var thlu lovin min uap reng a. Kan harsatna leh mamawh kan thlen apiang phûr taka ngaihtuahin hma an la zel a, tha leh zung an va sêng nasa tehlu em! Hetianga hruaitu tha leh inpe Pathian bel ruat kan nei zel hi Kohhran Hmeichhiate kan nihlawh hle a ni. Central lama kan hruaitute, Kohhran leh Bial tina Kohhran Hmeichhia hruaitu leh member-te thawh rimna leh inpekna hian pâr a chhuang zel ang a, he Women Centre hi hmeichhe khawsak harsa leh chanhai zawkte lei rem rahtîrtu leh malsawmna thlentu a nih zel kan beisei tlat a ni.

13. Thawktute vanneihna: Women Centre-a chengte hian tawngtaipuina kan dawn nasat êm avângin keini aia vannei hi an awm bîk chuang awm lo ve. Keini a thawktute hi mi fel lo leh chak lo tê tê ni mah ila, min tawngtaipui rengtu kohhranhote kan neih tlat avângin kan tih theih bakah Pathian a che mai thîn tih a taka hmu leh tawngtute kan ni.

Women Centre a taka kalpui a nih ațanga vawiin thlengin harsatna lian tham tâwk lovin tuang takin kan kal ve thei zel a, hei hi kan tih theih a ni lo tih kan hre chiang khawp mai. Engkimitheitu Pathianin min rel felsak vek a, batch tinah hian Pathian ropuina a taka hmuin kan tawng nasa hle. Kan mamawh tâwk ang zelin Pathianin min thuam thîn a, hei hi kohhranhote, a bîk takin Kohhran Hmeichhiate min tawngtaipuina vâng chauh a nih avângin tha thlah lova tawngtâinaa lo tawng zel tûrin kan sawm takmeuh che u a ni. Rinnain ke pen zel ila, kan hmeichhiatpui chanhai leh dâwmkan ngai zawkte chhawm chhuaka, eizawmna kawng hawnsaktu Women Centre a lo vul zual zel ang.

HYDRANGEA / HORTENSIA

- Lalrinchhani, HEO (FI)
Mizoram Florists Association

Botanical Name : Hydrangea hortensia

Family : Hydrangeaceae

Hydrangea hi pangpar khawi atân te, pot-a chînah leh pangpar huana phun atân tlangram leh khawvêl hmun hrang hrangah kan uâr hle a. Hydrangea genus hnuaiah species 60-70 lai a awm a. Chung zîngah chuan kan chîn uar tak Hydrangea hortensia hi a lar ber pawl a ni. Kung hniam tê, thang duang tak, buk lih leih tak niin a par te pawh a mawi hle a, a par te reuh tê têtê chu rawng pawl, senno, a var, a sen, nawinawk rawng te niin (par 100 vel bawr) kuang khatah mawi takin a inrem khawm thîn a. Hydrangea te hi variety 600 chuang an awm a ni.

Ram hrang hrangte pawhin an hlut hle a, kum 2011-a Flo'raholland-a pangpar an ilam tum khân pangpar khawi chi tha 25 thlan chhuah zingah 11-na a hauh pha a ni. Pot-a pangpar phun chi zingah tha zual 10 an thlan chhuah zingah pawh tun hma kum li (4) chhûng khân a lang pha a ni. Europe, America leh Asia-ah pawh lar hlein, pangpar huana an chin zingah kum 2010 & 2011 chhûng khân palina a hauh a ni. Chuti taka khawvêl ram dangah hlut a nih

angin keini ramah pawh kan chîng uar hle a, pangpar kan neih langsar tak zinga mi a ni ve hial ta a ni.

Hydrangea chîn leh enkawl dan

1. Hydrangea te hi lei ban lutuk lo, lei thâwl tha, lei tha (Hnimhnah tawih) leh chaw tha pai tui pawm/pai rei theiah an thang tha thei ber a, lei thûr leh al dan azirin a par rawng a danglam ve thei. A tlangpuiin lei thûr tak, pH 5.5 aia hniama chîn an nih chuan par pawl an pe

chhuak a, hei hi lei thûrah chuan aluminium awlsam taka thlain an ei theih vâng a ni. Lei ala chîn an nih erawh chuan a par senno an pe chhuak tlangpui. Pangpar pawl kan duh a nih chuan kan chînna leiah aluminium sulphate a telh theih a, a senno (pink) kan duh a nih chuan chinai pawlh mai tûr a ni.

Hydrangea te hian zing lamah ni kang ða an mamawhin chawhnu lamah chuan ni hlim deuh an duh ber a; amaherawh-chu, ni hlima phun an nih pawhin an ðang ðhain an par ða tho a ni.

2. Hydrangea te hi a ðang chang tawh aţanga tihpun ðhin a ni. A ðang, cm. 10-15-a sei, pencil tiat te chu December-January thlaah vih nun tûr a ni. A ðang vih nun turte hi IBA emaw, rooting hormone (Seradix/Rootvin) hmang emawa minute khat chiah hnua vih nun a nihina ðang thi a tihtlem phah. A ðang, a zîk lampang, cm. 8-10-te pawh March-April leh September-October thla chhûng pawhin a ðang vih nun tûrin a hman theih a. Uluk taka enkawl chuan kar 5-6-ah a phun sawn theih. A zîk

lampang vih nun tûr chuan rooting hormone hman bakah boruak uap leh hnâwng a mamawh a, green house, mist chamber awm telnaah a hlawhtling thei ber.

3. Hydrangea te hi November-February thla chhûnga phun a ða ber. A ðang vih nun te phun sawnna lei atan hian lei thawl ða, lei ða (Compost/Manure), hnah ðawih 3:1:1 hman a ða ber a, pot-te chu cm. 15 aini a tê lo tûr a ni. Huanah bed siama phun a nih chuan metre 1.5-a inhleta phunin hmun 3-5 bawr vêla phun tûr a ni.

Enkawl zui dan: Kum 3-4 chhûng chu a ðang tan leh hlwi a ngai lo va. Chumi hnua chuan a ðang kum 1-a upate chu tan tûr niin, a pêng chawr nasa lutuk leh ðangkai lo laite chu thlasik laia hlwi tûr a ni. A kung a lo len tawh lutuk chuan a ðang hmun lia ðhena hmun khat hlwi tûr. Pot-a phunte chu a tê tûra kan duh a nih chuan a zîk te siha, a buk dan tûra a ðangte paih mai tûr.

Fertilizer a tui a siam 10-ISg urea leh IOg potash hi pot

pakhat a thlai tan pek a tawk hle. A par that nan leh a kung than nan bawngêk hmin tha 3kg leh NPK (12:32:16) chawh-pawlh siama, leia kan phun bawr khatah 50-60g zel December-January thlaah a tang hlawi zawhah pek tûr a ni.

A natna langsar zualte: Anthracnose, powdery mildew (vut buak), bud blight leh bacterial blight-te hi an langsar zual.

1. *Anthracnose natna* : Hnah naupangah chuan rawng uka bialin a inrin kual a, val a lo awm ang a, a rawng a dum lek lek ang a. A rei hnuah a hnah valte chu an lo inzawm a, hnah val lian pui pui a awm ang. A vên nan Bavistin Ig tui litre 1-a pawlha kah tûr.

2. *Powdery Mildew* : Hnah hnuai lamah a powder vutbuak rawng ang lo awmin hnah a rawn tiuk telh telh ang a, a tang no deuh te, pangpar kuhmûm leh a kûngah te a natna a kal chho thin. A hnahte a hun lovah a til a, a par te a tein a parah a natna vânga val (rawng uk thet thet) te a lo awm thin. A vên nan Wettable Sulphur 2g tui litre 1-a pawlha kah tûr.

3. *Bacterial Wilt* : Hei hian hnah tawih leh a zung tawih a thlen a, a kung te a lo vuai sul thin. A vên nan lei thianghlina phun a ngai, thlai hrisel, natna kai lo phun tur, thlai chînte thlak kual tûr.

Rannung ei chhetu langsar zualte

1. *Aphids & Scale Insects* : Thlai peng a no lai, a zik, a hnah no leh a tang, a kuhmûm velah rannungte hian an bawh a, thlai tui an hip a, thlai than nasa takin an timuang. A ven nan hian Dimethoate 0.3 ml tui litre 1-a pawlha kah tûr.

2. *Capsid bugs/Thlangdar* : A hnah a chik kuain hnah khâwr nasa takin a siam. A vên nan Dimethoate 0.3ml tui litre 1-a pawlha kah tûr.

3. *Weevil* : Weevil-te hian pangpar hnah tlang an ei a, a zung leh a kungpui lei hrulah an ei chhe thin a, thlai than a tithu thin. A vên nan Nuvacron 0.5ml tui litre khata pawlha kah tûr.

(Pangpar khawi tûr reng reng i lakin sakawrbakcheh hmang lovin chemte hmang thin ang che. Chemtea lak hi a tlo duh zawk a ni.)

*Hruaitute chanchin***ASHA THULUNG**

Pi Asha Thulung hi Pu J.B. Rai (L) leh Pi Tialhluani (L)-te fa upa ber niin kum 1970 khân Lawngtlaiah a lo piang a. Kum 1991-ah Upa B.K. Thulung-a nênn inneini fapa pahnih an nei a. Tunah Aizawl Zotlâng Vengah an khawsa mêk.

A pa hi sipai a nih avângin, a naupan lai atanga a puitlin thlengin India ram hmun hrang hrangah awmin a sei lian a, Isua chanchin a hre ngai lo va. Kum 1986-ah West Bengal-a an awm laiin an thenawm, Hindu nu pakhat damlo chu an puithiamin a thawi a, dawi hmanga tihdam tumin nasa takin a bei a. Pawisa tam tak an sên hnuah damlo chu a thi ta tho va, TB natna a ni tih an hre chhuak

zui bawk a. Chuta tâng chuan Hindu pathian chu a ring tawh lo a ni. Pathian dang a zawna lamah *Bible track* a chhiar atângin Lal Isua a lo ring ta zâwk a. Rawngbâwlna dangah pawh a theihtâwpin a inhmang ve thîn.

Rawngbâwlna lam: Pasal a neih kum atângin Kohhran Hmeichhe rawngbâwlnaah leh kohhranah a inhmang ve tâng a. Himali Kohhranah kum 10 lai Committee member a ni a. Kum 2015 khan bial Financial Secretary atân thlan a ni a. Kum 2016-ah Himali Pastor Bial a lo ding thar a, chutah chuan kum thum chhông Bial Chairman a ni.

Tualchhông Kohhranah kum 1996 atângin tûn thlengin Naupang leh Puitling Sunday School-ah zirtîrtu a ni a. Kohhranah Thuhritlu, BSI Collector rawngbâwlna chelh mêk bawk. A chipui (Nepali) ringlo damlote flawh chhuakin Lal Isua chanchin hrilh nan a hmang thîn.

A Bible châng ngainat zînga pahnih chu – Matthaia 6:1 leh 6:20 a ni.

MISSIONARY TANA AGAPE CHANCHINBU LAKSAKTUTE

Bial, kohhran leh mi mal eng emaw zâtin missionaty-te tân AGAPE chanchinbu in laksak avângin kan lawm hle a. Tun tumah hian ni 25.7.2019 thlenga a man peksaktute tihchhuah a ni a, remchang dangah chhuah chhunzawm leh a ni ang.

Sl.No.	Bial/Kohhran/Mi mal hming	Laksak zat
128.	Vanramthangi, Tlangnuam 'S'	2
129.	Lalremliani, Tlangnuam 'S'	1
130.	C. Lalremtluangi, Tlangnuam 'S'	2
131.	Nl. Zorammuani, Tlangnuam 'S'	2
132.	Sialhawk Pastor Bial Kohhran Hmeichhia	20
133.	Kawkulh 'N' Pastor Bial Kohhran Hmeichhia	30
134.	Leitan 'S' Kohhran Hmeichhia	50
135.	Ramhlun Vengthar Pastor Bial Kohhran Hmeichhia	40
136.	Tlangnuam Pastor Bial Kohhran Hmeichhia	50
137.	Venghnuai Pastor Bial Kohhran Hmeichhia	60
138.	Dawrpui Vengthar Kohhran Hmeichhia	80
139.	Ramhlun 'N' Pastor Bial Kohhran Hmeichhia	100
140.	Chhinga Veng Pastor Bial Kohhran Hmeichhia	10
141.	Bethlehem Kohhran Hmeichhia	10
142.	Salem Veng Kohhran Hmeichhia	20
143.	Aibawk Pastor Bial Kohhran Hmeichhia	12
144.	Maubawk Pastor Bial Kohhran Hmeichhia	30
145.	Zemabawk Vengthar Kohhran Hmeichhia	2
146.	Khawhai 'S' Pastor Bial Kohhran Hmeichhia	20
147.	Phullen Pastor Bial Kohhran Hmeichhia	20
148.	Maubawk 'W' Kohhran Hmeichhia	40
149.	Phullen Vengthar Pastor Bial Kohhran Hmeichhia	10
150.	Diakkawn Kohhran Hmeichhia	120
151.	Hlimen Kohhran Hmeichhia	20
152.	Maubawk Kohhran Hmeichhia	20
153.	Baktawng Venglai Kohhran Hmeichhia	10

154.	Tripura Mission Field, Agartala	1
155.	Durtlang North Kohhran Hmeichhia	20
156.	Damdawi Veng, N. Vanlaiphai Kohhran Hmeichhia	10
157.	Chawnpui Vengthlang Kohhran Hmeichhia	20
158.	Sialsuk Kohhran Hmeichhia	30
159.	Chawlhmun Kohhran Hmeichhia	20
160.	Luangmual Kohhran Hmeichhia	10
161.	Kawnpui Pastor Bial Kohhran Hmeichhia	30
162.	Darlawn Kohhran Hmeichhia	20

August thlaa mi chhunzawmna...

**KUM 2019 CHHÛNGA HMANGAIHNA INA NAU
CHÂWMNA PETUTE LEH AN CHÂWM ZÂT
(OFFICE LAMA DAWN)**

Sl.No.	Bial/Kohhran/Mi mal hming	Chawm zat
88.	Serchhip Chhim Veng Kohhran Hmeichhia	1
89.	Lunglei Chanmari Kohhran Hmeichhia	2
90.	Govt. Complex Kohhran Hmeichhia	1
91.	Bukpui Bethel Kohhran Hmeichhia	1
92.	Ramthar Veng Kohhran Hmeichhia	1
93.	Vairengte Chhim Veng Pastor Bial Kohhran Hmeichhia	4
94.	Bungkawn Vengthar Kohhran Hmeichhia	2
95.	Bethlehem Venglai Pastor Bial Kohhran Hmeichhia	5
96.	Chanmari 'W' Hmar Veng Kohhran Hmeichhia	2
97.	Thakthing Kohhran Hmeichhia	5
98.	Tuikual 'N' Kohhran Hmeichhia	2
99.	Tlangnuam 'W' Kohhran Hmeichhia	1
100.	Bairabi Pastor Bial Kohhran Hmeichhia	2
101.	I.T.I. Vengchhak Kohhran Hmeichhia	1
102.	Airfield Vengthar Pastor Bial Kohhran Hmeichhia	2
103.	Zuangtui Pastor Bial Kohhran Hmeichhia	2
104.	Tlangnuam Pastor Bial Kohhran Hmeichhia	5
105.	Sakawrtuichhun 'N' Kohhran Hmeichhia	1

106.	Phulbial Kohhran Hmeichhia	1
107.	Ramhlun Vengthar Pastor Bial Kohhran Hmeichhia	1
108.	Venghnuai Pastor Bial Kohhran Hmeichhia	3
109.	Kulikawn Pastor Bial Kohhran Hmeichhia	6
110.	Ramhlun North Pastor Bial Kohhran Hmeichhia	5
111.	Chhing Veng Pastor Bial Kohhran Hmeichhia	9
112.	Kawnpui Pastor Bial Kohhran Hmeichhia	3
113.	Kolasib Venglai Kohhran Hmeichhia	4
114.	Saitual Pastor Bial Kohhran Hmeichhia	1
115.	E. Lungdar Pastor Bial Kohhran Hmeichhia	1
116.	N. Lungpher Kohhran Hmeichhia	1
117.	Saiha Kohhran Hmeichhia	2
118.	Zonum Pastor Bial Kohhran Hmeichhia	3
119.	Khawbung Vengpui Kohhran Hmeichhia	1
120.	Lunglei Chanmari Pastor Bial Kohhran Hmeichhia	3
121.	Tuithiang Kohhran Hmeichhia	3
122.	Bethlehem Pastor Bial Kohhran Hmeichhia	3
123.	Maubawk Pastor Bial Kohhran Hmeichhia	3
124.	Kawrthah Pastor Bial Kohhran Hmeichhia	4
125.	Chanmari Kohhran Hmeichhia	4
126.	Sihphir Vengthar Pastor Bial Kohhran Hmeichhia	2
127.	Keifang Pastor Bial Kohhran Hmeichhia	2
128.	Hunthar Kohhran Hmeichhia	2
129.	Bairabi 'S' Kohhran Hmeichhia	1
130.	Ramthar Veng Pastor Bial Kohhran Hmeichhia	3
131.	Khawzawl Vengthar Pastor Bial Kohhran Hmeichhia	6
132.	Thingsulthliah Pastor Bial Kohhran Hmeichhia	1
133.	Vaivakawn Pastor Bial Kohhran Hmeichhia	4
134.	Khawhai 'S' Pastor Bial Kohhran Hmeichhia	1
135.	Nursery Veng Kohhran Hmeichhia	4
136.	Phullen Pastor Bial Kohhran Hmeichhia	1

(Remchang dangah chhuah chhunzawm leh a ni ang. – Ed.)

KUM 2019-2021 CHHUNGA INKHAWMPUI LIAN HRUAITUTE

Chairman	:	Pi Lalrinkimi
Vice Chairman	:	Pi Lalrinpuii
Gen. Secretary	:	Pi H. Lalfakmawii
Asst. Secretary	:	Pi Lalngaihzuai
Treasurer	:	Pi Vanlalrovi
Finance Secretary	:	Pi Lalsangluaii

COMMITTEE MEMBER-TE

- | | |
|------------------------|--------------------------|
| 1. PiAsha Thulung | 2. PiB. Lalrintluangi |
| 3. PiC. Lalrimawii | 4. PiChuaahmingliani |
| 5. PiF. Lalmangaihzuai | 6. PiF. Lalsangmawii |
| 7. PiH. Lalduhawmi | 8. PiH. Lalrintluangi |
| 9. PiHmangaihzaui | 10. PiHrangzuai |
| 11. PiLalmachhuani | 12. PiLahmingliani |
| 13. PiLallungmuani | 14. PiLalpianzami |
| 15. PiLalramzaui | 16. PiLalremruati |
| 17. PiLalrinliani | 18. PiLalrotluangi Sailo |
| 19. PiLalthakimi | 20. PiR. Lalthanruaii |
| 21. PiLalthanzami | 22. PiLalthlamuani |
| 23. PiR. Lalengmawii | 24. PiR. Lalrampari |
| 25. PiR. Lalroliani | 26. PiR. Vanlalthlani |
| 27. PiSailothangi | 28. PiSawithangi |
| 29. PiSiampuii Pautu | 30. PiThanghlupuii |
| 31. PiThangthuami | 32. PiVanlalhruaii |
| 33. PiZangeni | 34. PiZochungnungi |
| 35. PiZoluri Sailo | 36. PiZonunsangi |

Ex-Officio Member-te

1. Rev. R. Lalhmingthanga, Synod Moderator
2. Rev. R. Vanlalnghaka, Synod Secretary (Sr.)
3. Rev. B. Sangthanga, Executive Secretary i/c Kohhran Hmeichhia
4. Pi K. Lalliantluangi, Ex-Chairman
5. Pi Sailuti (PWF)

KOHRAN HMEICHHIA

Thupui : Thuhretu atana koh (Tirh 1:8)

- Thiltumte :
1. Kohhran rawngbawlina tihlawhtling tura thawh ho.
 2. Kristian chungkua din nghehtir tura ãan lak.
 3. ãanpui ngaite Krista hminga ãanpui.
 4. Chanchin ãa puan darh.



Postal Regn. No. MZR/ 53/ 2018 – 2020 RNI Regn. 40876/ 88



Chanmari West Pastor Bial - Leadership Training



Hortoki Pastor Bial - Leadership Training & Kristian Chhungkaw Campaign



Sateek Pastor Bial - Leadership Training & Kristian Chhungkaw Campaign

To

Published by Rev. B. Sangthanga, Aizawl, Mizoram on behalf of Agape Association.
Printed at Synod Press, Mission Veng, Aizawl - 796001. Copies – 40,400

www.MIZORAMSYNOD.org